

Surat Terbuka

Dalam Islam Tidak Ada Politik?

Saya tertarik hati untuk memperkatakan soal Islam dan politik ini – iaitu soal yang telah lama diperkatakan oleh bijak pandai dan ulama kita. Penulis baharu-baharu ini berkesempatan menghadiri satu majlis pelajar-pelajar Melayu Mesir kerana menyambut rombongan Menteri Pelajaran yang telah melawat ke Timur Tengah khasnya Lembah Nil.

Soal yang menarik perhatian penulis ialah sepatah kata yang telah diucapkan oleh Menteri Muda Penerangan, Tuan Jaafar Albar, katanya: “Menggunakan Islam sebagai parti politik itulah yang saya tidak kehendaki”. Islam hanya agama dan akidah, katanya lagi. Sebagai mahasiswa Islam yang menaruh rasa tanggungjawab maka saya berani mengatakan di sini secara berterus-terang.

Kalau kiranya tuan tidak setuju dengan apa perjuangan Parti Islam di Malaya ini jangan pula kiranya tuan cuba memperkatakan kepada kami dan kepada rakyat seluruhnya dengan mengatakan Islam hanyalah satu agama dan akidah, atau lebih tegasnya jauh dari berbau politik – manakala begitu tuan telah memperkatakan satu soal agama yang sempit dan tuan telah mengatakan soal agama yang mengelirukan rakyat murba¹.

Untuk memperkatakan soal agama bukanlah satu perkara yang mudah dengan berpada kepada majalah-majalah dan buku-buku kecil atau mendengar kata-kata dari tok-tok lebai sahaja, malah adalah memerlukan kepada pengajian tinggi Islam, kepada menyelidiki kitab-kitab Islam yang besar-besar kerana agama Islam bukanlah agama putar belit sekalipun oleh pendeta-pendeta, pakar-pakar politik atau *lober-lober*² besar. Dari itu marilah kita kembali kepada fahaman Islam yang sebenarnya yang mana selama ini Islam telah diputar-putarkan oleh bijak pandai kita, Islam dijadikan alat dalam mencapai cita-cita mereka.

Ini membawakan umat Melayu di tanah air terbahagi kepada dua golongan. Mereka yang bermati-matian mengatakan Islam hanyalah agama untuk mati, agama ibadat. Rukuk, sujud sahaja. Golongan ini manakala mereka diberi penerangan lebih kuat oleh pihak-pihak yang berkuasa misalnya, seorang pensyarah mengatakan – agama Islam ialah satu agama ibadat, politik-politik tidak boleh dicampurkan di dalam Islam, maka mereka bertambah-tambahlah imannya dengan kepercayaannya kepada apa yang dianutnya.

Golongan kedua pula ialah mereka yang telah menyelidiki Islam dengan dalam, mereka telah membongkar sejarah Islam yang dibawa oleh Nabī Muḥammad (S.A.W.) dari buku-buku yang ditulis oleh orang Islam sendiri, lantaslah mereka memperjuangkan yang hak. Lantas mereka melantangkan suara kebenaran sekalipun mereka akan mendapat caci dan cemikan³ dari pihak lawannya.

Saudara-saudara! Islam bukan hanya satu agama atau kepercayaan dan anutan-anutan, Islam bukan hanya akidah yang

¹ rakyat biasa
² mungkin yang dimaksudkan oleh pengarang ialah ‘lawyer’ (peguam)
³ ejekan

sempit yang harus dipercayai dan dipahat di hati sahaja, malah lebih jauh dari itu – siyasah, sosial, tegasnya Islam adalah agama untuk hidup, agama yang mengatur perbaikan masyarakat, negara, dan alam seluruhnya. Dalam hal ini Tuhan ada menegaskan dalam *Qur’ān* berbunyi: “*Wa mā arsalnāka illā rahmatañ li al-‘ālamīn.*” Menceraiakan politik dari Islam samalah menceraiakan kepala dari badan, mengeluarkan nyawa dari jasad. Keterangan *al-Qur’ān* mengenai ini berbunyi: “*Duribat ‘alayhim al-dhillatu aynamā taqīfū illā bi ḥabli min Allāh wa ḥabli min al-nās.*” Maksudnya: Malapetaka kehinaan akan ditimpakan kepada mereka di mana sahaja mereka berada melainkan mereka yang ada perhubungan dengan Allah dan perhubungan sesama manusia. Maka perhubungan-perhubungan sama-sama manusia itulah yang dikatakan siasah atau politik.

Bagaimana pula kita mau menafikan akan adanya politik dalam Islam dan Islam itu tidak dapat dipisahkan dari politik sama sekali!

Pada satu tempat yang lain lain Tuhan ada menegaskan berbunyi: “*Wa ibtaghi fī mā ātākallāh al-dāra al-ākhirata wa lā tansā naṣibaka min al-dunyā.*” Maksudnya: “Carilah apa-apa yang Tuhan kurniakan untuk kamu di negara Akhirat, tetapi jangan lupa hak-hak kamu di dunia ini. Islam tidak menegah umatnya untuk memperjuangkan hak-hak kepunyaannya, hak-hak kemanusianya yang berada di alam dunia, Islam tidak menjadikan seseorang itu dijajah diperkuasa hak mutlaknya. Tidak! Islam adalah menentang keras sikap itu.

Sedang Nabī Muḥammad (S.A.W.) pernah bersabda: “Siapa-siapa yang dibunuh kerana mempertahankan hartanya matinya

“... adalah syahid”. Asas politik kenegaraan dalam Islam adalah berpandukan kepada ayat Allah yang berbunyi: ““*Ya ayyuḥā al-nāṣu innā khalaqnākum min dhakarīn wa unthā wa ja‘alnākum shu‘ūbān wa qabā‘ila li ta‘ārafi inna akramakum ‘inda Allāhi atqākum*” Maksudnya: Hai sekalian manusia, Kami jadikan kamu daripada lelaki dan perempuan, dan jadikan kamu berbangsa-bangsa dan berpuak-puak supaya berkenal-kenalan di antara satu sama lain. Bahawa semulia-mulia kamu di sisi Allah ialah yang lebih takwanya.

Kalimah (*ta‘ārafi*) ialah kalimah asas politik dalam Islam. Kerana dari bekenal-kenalan tumbuhlah kasih mesra yang akan membawa perhubungan untuk kebaikan seorang maupun untuk seluruhnya. Terikatlah tali mahabbah di antara dua orang yang telah berkenal-kenalan sedang itulah politik dan itulah asas suatu politik.

“*Al-Islāmu dīnun waqā‘a uṣūli al-siyāsati wa al-tashri‘i wa al-akhlāqi wa uṣūli al-baḥthi wa dīni al-musāwati bayna ṫabaqātu al-nasu kulluhum.*” Maksudnya: “Islam ialah agama yang menciptakan asal-usul politik, syariah, akhlak, dan asal-usul ilmu menyelidik berfikir, dan juga menjadi agama persamaan di antara segala tingkatan dan lapangan manusia.”

Tidakkah dengan keterangan ini sudah cukup menyatakan bahawa Islam agama yang melengkapi dari segenap segi, lebih-lebih lagi di segi politiknya. Politik dalam Islam adalah lebih mendalam dan luas dari politik-politik yang diciptakan oleh barat dan timur hari ini. Telah pernah dianjurkan dan diperjuangkan oleh Nabī kita Muḥammad (S.A.W.) dan sahabat-sahabatnya dalam zaman yang silam.